

續縣志卷之九

藝文志

班史藝文止載篇目隋書因之搜羅備而討論精
矣後來郡邑志率皆彙錄一方之文妍媸並收繁
而無當君子譏焉茲編所取仍踵舊志而凡無關
邑事者槩不敢錄以其不可勝錄也其有關係者
存之珉珉魚目誚也奚辭

理玉商封事

王

章

漢京兆尹

大將軍鳳誣罔不忠非一事也前丞相樂昌侯商本
以先帝外屬內行篤有威重位歷將相國家柱石臣

也其人守正不肯詘節隨鳳委曲卒用閹門之事爲
鳳所罷身以憂死衆庶愍之鳳不可令久典事宜退
使就第自鳳白罷商後遣定陶王也上不能平及聞
章言天子感寤謂章曰微京兆尹直言吾不聞社稷
計

上安帝疏

畧節

陳

忠

漢僕射

願明主重察左右得無石顯泄漏之姦尙書納言得
無趙昌譖崇之詐公卿大臣得無朱博阿傅之援外
屬近戚得無王鳳害商之謀若國政一由帝命王事
每決於已則下不得偏上臣不得干君四方衆異不

能爲害

上桓帝封事

史

弼北軍中侯

時桓帝弟悝自蠶吾侯立爲渤海王僭傲不法弼懼其驕悖爲亂乃上書

臣聞帝王之於親戚愛雖隆必示之以威體雖貴必禁之以度如是和睦之道興骨肉之恩遂昔周襄王恣甘昭公孝景皇帝驕梁孝王而二弟階寵終用悖慢卒周有播蕩之禍漢有袁盎之變竊聞渤海王悝憑至親之屬恃偏私之愛失奉上之節有僭慢之心外聚剽輕不逞之徒內荒酒樂出入無常所與羣居

皆有一口無行或家之棄子或朝之斥臣必有羊勝伍
被之變州司不敢彈糾傅相不能匡輔陛下隆於友
于不忍遏絕恐遂滋蔓爲害彌大乞露臣奏宣示百
僚使臣得於清朝明言其失然後詔公卿平處其法
法決罪定乃下不忍之詔臣下固執然後少有所許
如是則聖朝無傷親之譏渤海有享國之慶不然懼
大獄將興使者相望於路矣臣職典禁兵備禦非常
而妄議藩國干犯至戚罪不容誅不勝憤懣謹冒死
以聞

漢齊蓋廟碑

韓

凝

唐昌
黎人

天子建德因生賜姓胙之土而命氏從其諡以稱族
自羲軒法天泊我唐垂拱取威定霸宏彌皇維者卽
錫姓封樹公之先伯益典司三禮尙父封公營邱助
化唐虞扶傾周漢爵窮五等榮冠百工雖繁華族莫
居其右公諱蓋字副世前漢平帝錫字漢賢公生爲
人瑞歿爲人神神而靈應代崇明祀考史冊薨位之
歲闕書徵譜謀降神之年無錄原其圖籍建號取公
之錫字而名漢賢神矣十一代祖周諡康公因避田
和篡亂爰宅於茲曾祖節皇懷州刺史祖賀皇左司
郎中考智皇成帝博士公五百年膺期挺生漢代神

識沈敏丰姿稟肅經濟之畧夙富於襟懷翊贊之源
久明於微旨節用於內樹德於外時無與京伐未萌
之謀世何能敵繇是平帝聞之深嘉其器累徵釋褐
拜宣議郎大明爲臣之節素抱匡時之術肅治明法
敬天畏人耿介對問有任座直言諫諍犯顏同朱雲
折檻帝念公之爲臣乃社稷之臣也乃錫之字時元
始季年蕃戎猾夏帝知公神武明畧又拜北平將軍
受律遄征爲民舒福五申誓衆定見無窮之勲三畧
訓兵決逞必然之捷桴鼓作氣果應神機大潰羣寇
振旅而返獻俘受馘帝輸鴈塞之憂命爵庸勲公拜

鳳池之詔除幽州刺史臨下簡肅御衆詳明清聲獨
彰飽聞天聽遷冀州刺史爰革舊規維揚新令間執
私黨斥遠姦回大副宸衷殊義不續封險瀆侯累承
渙汗倍戒驕淫絕盤遊之娛除罕弋之物化源旣厚
錫命愈深又封關內侯兼知河北道事兩部郡符救
旱有隨車之雨二乘侯印臨邊無擊柝之聲任彌重
轉勤位愈高尤謹居祿以德不其然乎詩云樂只君
子邦家之光公之謂矣時屬漢之季世臣莽鳩君逆
天肆克踐極公御哀之次憤氣填胸按劍呼天曰我
先帝朝夕思治寤寐求賢子惠困窮民服厥命任我

事効我功與惡而棄好非謀去順而效逆速禍天監
孔明敢臣僞主廼於幽冀中分以濟水之南深溝峻
壘繕甲兵具車乘戈矛林植雉堞雲平一方民飲公
之惠愛尙公之忠節罔不祇若時僞主令大將軍鄧
郁帥兵犯公公獨步戎場卓然雄畧不恃其險而恃
其德進戰虎賁爭先退守金湯莫固大挫勅敵不尅
而還公純臣純孝冠絕古今神勞遠謀思復漢業大
勲未集公薨於位冀趙之民號泣如堵耕夫仆耒若
子產之喪鄭邦童子不謠類五穀之亡秦國會漢室
復興追謚公號禮也有子五人咸名掩前哲克纘鴻

業章帝拜孟子爲郾中仲子左翊衛大將軍至和順
二帝徵命諸子建爵榮位易曰天之所助者順也人
之所助者信也公之一門克彰二美順契天道信感
人心美哉輪奐清廟凜凜儼然如生二子侍坐奉冢
祀焉趨詣者鱗集皆股栗懾威祈禱者雲臻俱心肅
生敬列國之君柔盛不替民有災而恩靈必贊歲若
旱而雲雨時興德著四維福流千古以爾靈感定霸
於茲不文於石奚彰厥美

學宮記

葛復振

元邑人

孔子之道發揮堯舜宏大三王甄陶賢知砥礪愚不

肖由是昭人文莫上下致中和紹元氣所以天地能
盡其大日月能盡其明斯世從可知焉信乎聖之至
而功之極也時厥後者京國路府州邑皆有學立廟
故自天子達於守令咸得通祀升降誠敬如弟子禮
夤緣各代追贈以侯若公若王而謚文宣增謚至聖
獨我聖元大德十一年加贈大成至聖文宣王南面
被天子旒章勅天下奉而祀之則其光寵前古未易
比隆惟蠡州卽漢蠡吾侯桓帝之故封在昔廟學掃
地無可考以致五代上下罔究且程二先生其祖五
世以上塋阡在焉屢嘗命駕過謁祖墓曷無文以遺

至元丙寅柳中人篤祿美世監是州也太守邢臺劉復泉同謀起廢聿新殿宇肇像大成以實正位飭塑顏孟配座左右閔冉曾等十賢東西向以從祀襲古制也自後監州者厯杜郭高朱四公續建講堂齋舍於東西廡增塑七十肖貌則其廟學方具體至蒙古氏徹里帖木兒監州事餘二載政清人和公偕同祿者各捐俸金楮幣社良里善互相助之者源源而來若有以陰相之也於是諸材以具遂隳其舊而鳩大之始於天厯己巳十月落成於庚午三月工費之餘市桑地八十畝卽以五千二百貫酬其直畀廟學永

主圭田以崇祀典

漢霍光廟記

王

輝

元學士

蠡吾志城西北郊有漢大司馬霍將軍遺祠俗相承
卽侯之故封考諸傳注博陸鄉名職方載博野本蠡
縣地居博水之野故名終以陵遷谷變疆理蒼莽有
不敢撫實者然卽地形相度今之博野安知非博陸
乎廟權輿究何代以信傳信必有所自至元十七年
予按部次州來謁祠下荒壇喬木宛在目中老年庫
漏不障風日過客惻然心魄動盪疇爲神睨而顧之
邪因屬守以義起廢具邦人瞻吏諾而退逮三十一

年甲午予承乏翰省左署郎官劉源郡人也以東曹掾徐鳳來告曰敝邑霍侯易而一新內翰幸不忘久約尙惠一言庶免旌紀寂寥之歎蓋嘗論人臣事君身名俱全克始克終者世難其人三代而下能膺斯任者惟將軍按將軍諱光字子孟早以大忠至謨見知武皇及其受顧命付後事至擁昭立宣罔辜所託班固論贊雖殷之伊尹周之姬且初不是過誠哉是言也所謂伊厖者爲天地立極爲生民立命爲萬世開太平是也其生則若爾其歿也與草木同腐豈理也哉且匹夫匹婦以一節獨行表見鄉曲尙能感激

後賢尸而祝之於社况將軍乎然神即人之心也誠敬所在乃神心之所在也今郡人業新斯廟歲時祭享因誠起敬如見風采其為神昭鑒也審矣若日修復故事敬共神明必獲報於下執事此則神當然之理吾不當以是徼於冥冥也

蠡縣學記

蜀人

張

潮

明吏部左侍郎

國家監古育賢諸府州縣建學立師具載功令蠡故有學歲深傾圯風雨侵漏祀訓草畧教諭史資德大懼黷禮湮化瞻依無所而儒效弗振也嘉靖乙未乃以狀移縣上府暨諸臺院時巡撫都御史劉公夔巡

按御史姜君潤身嘉樂是議遂謀諸汪知府堅庇物
興事有日矣值境內災不果越明年歲日稔適御史
景君泰楊君紹芳相繼按部謝君少南督學至咸以
蠶之政教學爲先乃申前議益力丁酉孟夏檄下縣
丞張遷主簿張鸞撤其故而更新之木石瓦甃丹漆
黝堊悉取諸贖金民不知擾祠廟堂廡亭宇門序各
以其制師生有舍庖廩旣備枚枚翼翼百爾維新越
孟秋工告成釋奠於孔子學士大夫觀禮階下咸欣
喜咨嗟相與言曰廢興之理雖日期會亦豈非人事
耶今茲之役惟劉公能急先務以圖厥始惟諸執事

能不失其時以成厥功亦惟我蠡士人能奔走協相
以無負在位者之志語曰前事之不忘後之師也曷
圖所以不忘者於麗牲之石乃以使來請予記夫士
之學工之肆也各止其所以致其志一也肆孰圖之
工孰趣之是在我而已矣事未有弗成焉者也士之
學亦在我而已矣而況作之者之專且力乎是故居
有術業法有章程教有倫要凡以使民知向方而崇
化成之本也虞夏殷周之盛其養士之制至今猶存
而化民成俗之效乃叔季鮮有倫此其故可知也已
雖其制法之不同然修而明之存乎其人豈容有所

誘也記曰學官先事士先志官之與士相須以成者也亦惟各不失所當先而已且夫蠡固畿服之地菁莪棫樸世世丕旨蠡之士觀感而興起者宜有其志矣作而行之奉其身以殉道尙志而不迷於大夫之事者猶未之前聞也豈教學之具弗張而士之志且有所期待乎夫廢先聖之教使上猷鬱而不宣有位者之責也怠荒其志而不知感發士之恥也奉天子建中之化繇近達遠興禮樂以式下士至仁也凡百有位率作興事先教學以廣德心至忠也釋禮者曰大學之道明德新民而已先志明德也先事新民也

蠡之士亦盍圖所以自新者哉志不忘乃學孰大於是魯頌泮宮而春秋不書茲紀興作畧纖悉亦志其大焉已矣

重修蠡縣學記

陳善道 明邑人

蠡邑廟學自嘉靖丁酉重修迤今又三十餘年矣大較天時物理三十年必變則朽蠹剝落日就傾圯無惑焉先是隆慶改元教諭周君思大惻然於心謀諸同寅牒於縣請修之縣宰王公元賓乃轉請於撫按督學諸院各報可計動河漕餘稅銀兩市木石磚灰之類未備而王公擢廷評周君擢縣令皆去任越二

禩新令劉公伯縉至視學詣廟慨然曰爲政以人才爲先育才以學校爲先不興學不育才而以言治皆末也吾所務者莫此爲急矣於是集材鳩工圖終前緒舊貫可仍者仍之舊圯而可新者新之曰殿廡曰堂齋曰亭祠曰號舍次第畢修輪奐並美規制大備煥然改觀矣肇事於隆慶三年季春訖工卽是年季夏也夫其成功完美如是之速者何也蓋公之政能知所先務銳意圖爲而主簿李君東序教諭劉君相訓導劉君天麒典史陳君學又相與協力贊理之故是役也財不靡官力不疲民僅四越月而工告竣公

之用心勤矣哉既落成教諭劉君輩持書徵言於予
將鑿諸石用垂不朽余惟國家之制郡邑各有學固
將隨地以養材也祀孔子及從祀之賢必於學所以
示士人誦法之宗也祖宗創制意誠美矣今聖天子
崇儒重道文教覃敷卽位之初幸太學拜孔子固足
以振揚士氣而寓感化之機又納廷臣之言行令天
下端士習正文體轉移倡導之術又何其善哉是故
一時內外臣工靡不感激奮勵滌慮洗心祛舊習以
贊新治卽今廟學之修作興士類固有司事也孰非
仰承朝廷德意而爲之者耶則士生斯時際斯會者

幸矣幸矣余聞之豪傑之士不待教而自興教之而不興者其何以士名乎夫學求乎道者也道本之心者也道孰外於人倫而心莫先於敬一孔子之所以聖羣賢之所以賢皆能明此而已我聖祖建學而必匾其堂曰明倫世宗先皇帝御製敬一箴頒於天下學宮所以示人進修之要者旣明且切矣吾黨之士藏修游息於斯其朝夕之講習彼此之相琢磨者又奚事於旁求哉亦惟主敬一之心明人倫之道而已主敬一卽孟子所謂求放心明人倫卽所謂歸而求之有餘師也進於是者則心存理得本立道生聖賢

學問自我舉之處可以表正乎鄉閭出可以翊贊乎
治化而於朝廷重學有司修學之意庶無負矣吾黨
勗諸

創建尊經閣記

龜縣教諭蕭日華

我明稽古右文徧設黌序屢厯聖天子申飭功令率
以經術爲首重云顧崇重經術勿令弁髦吾道爲縫
掖倡則有司事先是邑侯王公國賓以論宅不吉捐
金遷文廟之左議建尊經閣於是地時民部需公
亟有待已嗣後曹公來牧蠡公才且識先務甫下車
獨重首善地謁廟講學畢徧歷周覽見明倫堂後

曠地一區輒曰此地何不創一尊經閣俾士人有所
持奉養爲明經大儒需國家緩急之用以當上意乎
於是卜吉啟土鳩工集材命主簿黃君宗元董其事
責令省祭陰陽生以分理余亦與兩司訓彭公學孟
樊公登瀛時爲調度五閱月而閣告竣高棟倚雲彩
文煥斗前有懸臺凌空後有重門洞闢且也月臺甬
道偉然奇觀乃舉六籍羣書悉貯其中淵然一道德
文章府示人以希賢希聖階梯節青藜石渠奚讓焉
識者曰此足以尊經乎公曰非也六籍紛紛古證今
今證古語語傳他心印一中默默凡同聖聖同凡人

人具此文章儻不於心事源頭求了悟只從紙上索
筌蹄安所稱尊士誠懼然以思素王往矣道德文章
班班簡冊其心至今在伏處蓬藿者誦其刪定讀其
作述津津然有味於中直探所謂古今聖凡一貫實際
毋滑情以遷志一旦釋褐鵲起陟彼華廡則猶遵軌
依型益恢經濟斬不負乎所尊夫然後千秋月旦推
而躋之干霄之品磊落天壤焜耀鼎鐘令人指曰某
某起家經術乃云尊哉乃云尊哉一時聞公言頓覺
士心鼓舞人文蔚起是秋卽有周生日強耿生桂芳
兩薦賢書異日者甲第聯翩臺閣烜赫孰不自尊經

中出亦孰非祥發自公也耶雖然此特公崇重經術
一端耳至其寬以宅衷嚴以飭法種種善政膾炙人
心靡不喜其來而悲其晚又恐遇之晚而去之速口
碑難罄筆書難殫非真能以經術經世能有此事業
有此盛舉哉是舉也謀始於己酉仲夏而小春落成
蠡摺紳人士同聲頌義忻然助金鐫石以垂不朽問
記於余余曰公美公弗能記卽記亦不能悉公美況
今奉欽命司民曹日且躡履朝端振翼密勿則竹帛
勒勲又自有太史公在余復何贅曹公諱昕號初陽
辛丑進士山東冠縣人

兵憲錢公城蠡吾碑記

關中

李景廉

明簡
討

邑無百雉之城侯伯之城徑二百雉大都不過三國之一制也周制度量以人之體爲法布指知尺舒肱知尋四分工尺而損其一得周尺焉蠡城以今尺計之萬二千二百一十二尺有奇踰三百雉矣名爲縣其城則郡也豈唐虞建萬國以親諸侯幅幘未廣周爲千八百國一圻一同築城伊減遂以過百雉爲國之害而漢侯蠡吾爲王室懿親故延衰乃爾耶蠡隸上谷則爲支邑駐憲節則爲重鎮蓄衆容民設險而守比於趙上黨魏安邑燕榆關結其四援正其疆場

險其走集明其伍候於以控制郡國而下令流水之
原固守相之所宜分功版築者也嘗讀詩至溥彼韓
城燕師所完呂祖謙謂春秋時城邢城楚邱城緣陵
城杞皆合諸侯爲之霸令尙如此而城諸及鄆城成
郭城汝濱俱稱帥師見城非大衆不集也况當天子
命憲臣專節之日乎惟時郡伯黃君師夔咨諸易守
黎君志陞完令高君允茲輩謂易水建城之日州帑
積有贖鏹工作饒多戍卒財用俱優且以三年底績
今殘傷未起物力不支州邑其與幾何豈能以土壤
增高嗣是歲苦魃狃吏多遷調觀察錢長玉先生軫

念三殘邑其來輸者仍歸之其他未及輸者且檄停
之諮官府哀倉癘計捐金錢二千五百六十金城蠶
七白金城祁以紓百姓之力而蠶先庀役焉先生謂
取材於埏埴反落吾事遂弛雙甄之令昂其值以廣
招徠倣范文正趙清獻周文襄榜示衢路之意未浹
辰而雲集駭爲神輸邑令連君元捐貲佐築凡一千
三百金於是朱門士族工賈駢望瓴甌輻輳先生若
躡蹠於不得已而拊循慰藉之復不有其憲府之尊
優晨而出日夕而入與封人慮事弄工置槩引繩正
其蹠敝謹其齏薜屏其扑扶時其酒脯合萬姓之懽

心作百堵之銳氣傳所稱計丈數揣高庫度厚薄勿
溝洫議遠邇量事期計徒庸慮財用書糶糧度有司
三旬而成不愆於素者其於先生真大師之垣而衆
心之城也先生稱春秋之義役不違時夏秋築城皆
以不時書九月築臺且謂其妨於農收而單襄公述
時儆曰收而場功待而畚揭營室之中土功其始然
則非陽月未可舉事明矣龍見而戒事火見而致用
水昏正而戒日至而畢先生以亞歲之先三日休廼
役車偕其庶尹師儒登城而望雲物布几筵凡効力
於板幹之間者雖微必旌於是匠石輟斤父老命觴

垂纓影組之倫薦其樂只我任我輦之輩報以載甯
第觀郭郭周匝重城結隅井里延屬邑屋隆夸戍廬
櫛比樓櫓碁布填衢陌而觀者相顧錯愕而先生以
爲此古人已試之法也昔漢孝惠城長安發六百里
內男女十四萬作兩月而成城書法且譏其久周韋
孝寬當齊師壓境築城於險要以制之十日而辦元
載請城原州以禦土蕃乘間築之二旬而畢貞元中
塞外無復保障詔城鹽州豐安河西亦二旬而畢楊
朝晟築方渠合道木波三城尤近北境三月而三城
成皆如其素章棗城平夏陽繕理他皆以示怯而陰

具版築守戰之備二旬又二日城成徐禧率諸將築
銀州卅十四日而成先輩邱文莊亦謂城郭之守不
可以久稽此何時也而猶作遷延之役乎故無先生
俄頃之功不足以固萬年之業也自古忠臣智士畫
安攘之策者曷嘗不以浚復城隍爲第一義本無禦
暴保民之心第曰吾且息勞疚耳夫民惡憂勞我佚
樂之民惡危墜我存安之民惡滅絕我生育之此管
子以予爲取之術也今予以存安生育之二利卽不
免於憂勞取者狹予者奢矣月令孟秋補城郭直與
以康甯又安見其憂勞乎故數困難成延歲月而失

不可及之功坐耗之道也綱目三千年內城書京都
外城書關要蠡肩臂神京阨保南之門戶而固其堂
輿功不愆期天若助順自英廟以來修而圯圯而復
修有不踰月而規萬年之宏基如先生者乎而先生
固非第掌固司險之事也夫其發華滋於枯蕘育豐
肌於朽骨與郡縣守若令相告以生民之不易而戒
懼之不可以怠也分貧振窮收介特救災患息征徭
省冤濫詰奸慝戒戎作當茲寇攘充斥逃亡載路面
隸先生之字下者不獨驚形永匿且鷹眼盡化矣荷
先生之再造者不第扶杖而觀旣量腹而受矣卒伍

整於里甲士寓於農澤葵荒葛頽垣斷塹之中忽見
邑居隱賑分鄽列隧之盛目中夏而布德瞰四裔而
抗稜民無內憂而又無外懼令聖天子有金城此物
此志也

重修文廟記

國朝知縣

祖建明

廟學建於縣署東南其方面廣闊已有定額歷朝崇
儒重道載在典籍我

國朝定鼎中原首重國學次及郡邑不乏祠祀蠡居畿
南大邑人才丕茂彬郁繁興倘本原之地莫之或崇
其何以德成人而造小子余蒞任蠡境知興賢有地

於行學講習之日謁聖參躋步自櫺星戟門前入至
墀第見廟貌僅存門楹盡圯因與學師及諸生議謂
政治以興學爲先屢經兵變之後只求救死故禮義
其未及治也而今而後仰體

聖天子作養之美意當爲

國家培元氣各生諒出資費肆錢余卽爲之首倡以圖
更新乃於己丑歲學師艾元建生員朱際昌賈潛劉
標賈瑣等輪流督工收支清楚余命各社夫役共爲
視事約一日不下百名其四圍牆垣版土皆作先將
聖廟重新琉璃磚瓦備費躊躇次而明倫堂大爲整

頓其東西兩廡鄉賢名宦二祠櫺星戟門庠門按次
修補俱令更新余亦頗曉風水觀泮池影壁太爲短
迫後學恐未盡利也將影壁南更數尺而禮門義路
牌坊務令南向玲瓏其前面煥采其宮牆俾文氣悠
永將甲第繩繩矣若此者余居蠡四載殆未有一念
不爲作養慮數祀經營除闔學設處外余仍費銀一
百三十七兩是歲之十月孟冬始告竣

魁星樓記

知縣

祖建明

稽文廟在蠡城南門之西地基南壓古建國之初凡
大都名郡有廟學卽有樓星高閣以映文明其定論

也蠡自漢封必按星位余審地理正經其學圖高峙
似傷金殺宜樹火星以相敵抗值茲文廟重新卽與
邑耆商國家兩利之道邀學師諸生過我而擬議之
文廟旣新余願建魁星樓於東面一以助文風一以
敵西方金殺之疫意者其可乎應曰風水所注攸關
氣運蠡之缺魁星久矣憾未得其人以倡之父母之
用意美而利國多其何容已地因占城之東南吉卽
以早作余先輸銀百兩呼工役而命之曰磚灰木料
人夫工價俱自余出願不勞民間錙銖之費其紳衿
之願輸者卽令續錄余蓋不之強也於是季春始作

而孟夏告成計層樓四丈底石圍磚凡六進皆以灰
灌及頂石階花牆其臺座也朱楹分柱四券明通八
牖團圍塑像巍峩棟宇華采約費五百金除正助之
不足又續捐以總其成嗣是文運丕興方宇甯靜其
亦有補於建置之萬一云

重修文廟碑記

閆中寬

邑人

斯人不可一日無性情故天下不可一日無政教天
下不可一日無政教斯學不可一日而廢於天下古
者遂生之後維以正德教化廣而風俗成皆於學焉
是賴讀王荆公慈谿縣學記不獨鄉邑之俊秀子弟

習業其中凡一藝一能以及俘囚獻馘之大事無不出於學三代尙矣漢興卽詔天下郡邑皆建學羣天下士而講習其中公輔文章之選彬彬如也沿及後世未之或易學固教化之所由興而風俗之所由成歟今

上不興文教加意學宮幸闕里頒御額捐修盈二百金者晉銜京學驅旗丁侵佔者加秩於戲崇儒重道之盛心蔑以加矣蠶吾爲漢桓潛邸後改州爲邑璧宮之建宏厥甲他郡年來風雨漂搖星移物換浸假而垣墉頽浸假而齋廡壞又久而大殿朽敝倫堂傾圮文

昌閣賢宦祠俱成瓦礫烏棲鼠竄殆不止鞠爲茂草
之可傷也前守土者皆視爲不急之務寒氊子衿亦
相視增感而已卽有一二君子非抱恨於巧炊之棘
手卽攢眉於積牘之如山雖修葺有言亦銷鑠於煩
難叢脞中而究無實舉也先是柏臺陶公視篆時慨
議重修經始計工有克底成績之志會內擢未果丙
寅之秋邑侯趙老父臺來尹茲土謁

聖廟目覩凋圯不勝愴惻曰興賢育才之地頽敝如此
否火不幾息焰絃誦不幾輟響耶是殆余之責也夫
用是與學博劉君亟謀重修之舉劉君雅有夙志樂

與同心他如隍廟嶽祠城樓察院諸廢墜皆議修葺
斷以學宮爲首務鳩金庀材多方籌度工費浩繁約
以千計不曾派社甲一文手疏倡人咸樂輸梓材
匠料捐助金錢一委劉君典之劉君公勤敏慎夙夜
靡遑指畫措置條理井如又有鄉貢齊君庠生張君
勤劬不怠協心翼勸閱數月而殿廡堂祠垣墉齋閣
悉告成功雕甍天際丹雘輝煌視昔有加又出俸金
購置大成樂器琴瑟笙鏞金石匏革象數粗備多士
日集倫堂考鐘伐鼓歌闕宮泮水之章頌公之功而
颺公之德公且引爲分內不自有其功也昔范文正

公出判河中郡士子執經問難文正建學舍以處之
有言此非公所宜急者文正曰不然人必講學而後
明忠孝忠孝明而後有事業學舍不立則講習無地
忠孝何由而明吾蓋欲子弟有性情而海宇斯有風
俗也我公之修葺學宮不與文正公先後同揆歟吾
邑人文霞蔚科第雲蒸固稱盛矣得我公丕新而振
興之從此修德行而工文學幸邑人而爲孝子悌弟
之行幾敦龐忠厚之習者多士之責也其益知所勉
哉公真可以風守土而樹之型矣鐫石紀績蠡人士
其何能忘是役也主之者趙公旭河南修武人丙辰

進士成之者教諭劉公繼聖山左濰縣人贊之者訓
導李公維熊邢臺人督工者邑幕彭公騰化陝西富
平人邑人鄉貢齊可均庠生張鳴雷始終勤勤如一
日例並誌之餘悉勒名碑陰

烈香集序

邑令 趙旭

余昔讀節婦高行傳重其義然待梁王三使往聘始
引義自決曰婦人之義一醮不改忘死而全生棄義
而全利何以爲人援鏡自劓節因以完旌曰高行亦
以晚矣曩使夫殞之日卽早辦一死爲亡人先軀驅
螻蟻固將昭昭然揭日月而行矣又何至殘形以自

全三聘三拒之擾擾爲也雖然死固不易處死尤難
白髮在堂呱呱在抱勢當爲良人守此一塊肉此可
以不死者也若上有所託下無所累一死而身名全
倫紀立節烈昭剛常備可以對亡人可以慰父母可
以光閭里而耀邦國榮彤管而輝青史天地之正氣
得斯人而常存相協之彝倫得斯人而無斃聞之當
時興頑而起懦傳之後世山高而水長繙史冊閱寰
區蓋不數數覲也於古得衛之共姜於浙得處州湯
煇妻張氏近代則有臨川王氏覃懷之趙貞女於保
陽得滿城之范烈女蠡吾之徐烈婦范烈女別自有

傳士君子歌和成帙有雪棠集行世固不煩余之喋
喋矣徐烈婦慷慨殉夫事在康熙己未同邑賈生顏
處士並爲立傳譜其事甚詳且悉余讀而嘉其義悲
其行且痛其不幸而不獲出於從容就義而遺憾以
終也何以明其然也烈婦當良人易簀時執手歎歎
曾受血嗣之託雖哀毀骨立業以張陸自許方且欲
爲和熊畫荻之故事期有以報良人也伯麟殤而誓
死之志決蓋不得志於保孤之難而甘爲死節之易
耳烈婦之心苦矣人以死節爲殉夫余以死節爲從
子也何也伯麟亡而誓死之志始決也使天不早奪

伯麟烈婦必爲歐陽永叔母爲陶士行母爲王珪周
伯仁母其幹旋成就當大有可觀豈僅作一硜硜自
了之人哉噫烈婦之心良苦矣然而殺身成仁舍生
取義又非尋常巾幗之所能爲也推其志與冰雪比
操可也諸君子誌美揚休長篇近體皆殷殷留金石
聲賈君彙輯成卷題曰烈香蓋以釋纒挺立殮撫醜
香與未醜殉夫海棠變白者同一奇蹟將並雪棠以
行世愧余筆無花不足以闡幽光而表揚節烈文守
土者之所不容辭也爰構俚言而併爲之敘

文廟重修碑記

知縣

丁麟

邑之有學所以儲人才講政事敦教化也歐陽文忠有言學校王政之本豈不諒哉蠡吾密近畿南沐浴教澤生徒號爲繁盛博士弟子數嘗甲於一郡而登賢書成進士者亦後先相望何其盛歟乾隆甲申余奉

命宰是邑初下車齊沐謁文廟竊見殿宇堂階丹漆剝落

東廡傾頽竟成烏鼠風雨之區蓋自順治時祖公建明康熙初劉公文燦相繼修葺之後歷今九十餘年前令未嘗不議及之而經費不貲遷延以至今日亦已久矣余大懼頽之滋甚也又懼費之不繼也且學

搏頻歲移易因獨任其責捐俸以爲之倡惟紳衿士庶之樂輸者從焉弗願弗強也其出納工作之事專委之諸生范會一黃河清不使一胥吏藏獲輩干之二生踴躍急公敬順將事經營於丁亥戊子間東應明倫堂東齋崇聖祠尊經閣次第修整於是朔望瞻拜之餘得優游講習無輟焉余意欲建忠孝祠且以舊有節孝祠遺址僻處縣西擬改建學宮旁以昭敬慎因河工堤埵頻煩民力比歲復不登輟焉中止壬辰之秋復修理鄉賢名宦祠又相度學宮隙地創忠義節孝祠各三楹並列南向繚以周垣門窗庭院秩

如穆如中奉木主外各懸一額舉凡義路禮門及櫺
星戟門泮池之傾塞者一律庀材修浚內外圍牆周
整彩色煥然費千餘金工歸實用范黃兩生始終不
懈實克勦余而余數年來經營之心亦得稍釋由是
文廟之中賢才興祀事肅士風醕民氣厚上以副

聖天子教澤之盛下以繫閭邑士民之望余亦得藉手而
樂觀厥成是余之幸也夫是余之願也夫諸紳士請
勒石記實余弗獲辭因序其巔末如左且期與後之
蒞斯土者共保護於無既云

重修奎樓記

知縣

周元理

蠶邑東南隅因城爲基層累而聳峙者奎樓也樓故
有舊址定方於巽巽爲風惟風鼓動煥厥文明爲一
邑光此奎樓之所由建也詩曰高山仰止景行行止
樓尊奎宿而卽以奎名謂其降臨有主而怵目警心
也多士欽承崇效則斯樓益不可廢而形家甲第科
名之說其淺焉者耳前邑宰長沙饒公從邑人請倡
議興修廢者一起署篆綿水宋公繼之士民懽赴乾
隆丙寅秋余蒞任茲土深嘉其事之有裨於文風也
復爲鼓勵而落成之越明年紳士備述經營月日請
余爲記余因攀城而上拾級登樓北望

禮京咫尺隱然丹鳳雛稭庶幾近

天子之光乎南瞻鄒魯龜蒙鳧繹之區典型其猶未遠也
且夫十室之邑必有忠信彈丸之地可以絃歌人苟
克自振拔無不可登峯造極以日進於高明況乎地
効其靈神鑒在茲有引之而上達耶從此敦崇實學
丕振人文爲

聖朝興起教化胥於斯樓乎信之又豈徒如形家所言哉
爰爲作頌以記曰奎樓之南雲樹鬢鬢英華遠吐許
我阻含奎樓之北巍巍

王國拱手朝宗錫汝保極中有奎星形於無形千秋俎豆

明德維馨瞻望左右文光射斗水媚山輝得天獨厚
撫青霄而直上則惟斯樓之歷久而不朽

書院碑記

知縣

張夢麟

尊經閣邑文明地也前任滇南丁公捐廉倡修書院
卜吉址於閣前構精舍數十楹顏曰成材嗣又集薦
紳飲膏火月兩課會文於其中不逾時公調繁去丙
午秋予攝篆於茲邑人士猶盛稱之按縣志前明以
來或名振英書院或名有斐書院廢墜幾二百年矣
公一旦創立重興宏開造就之區於戲偉哉今距公
之去不過六七年耳房屋垣牆間有損壞不歲時修

聿久恐復成傾圮且何以誌滇南公之遺愛乎予又不忍文明重地漸就蕪沒爰籌款若干以次補苴俾同城劉生慶清吳生錫齡齊生德香王生縉董其成咸請勒石乞余爲記予旣重滇南公創建之盛舉而又嘉諸君子之勤誠也其何能辭予思書院之設上培風化下育人材誠不可一日廢今旣勒石凡課誡之條款資餼之生息捐資之姓名悉列碑陰垂諸永久尤望後之蒞茲邑者踵事增修實心考課毓茂才儲偉器士習文風蒸蒸日上洵副滇南公成材之望予亦與有光焉是爲記

重修文廟碑

知縣 秦聚奎

咸豐九年秋九月聚奎攝縣來蠡下車齋沐謁

文廟見東廡侈剝殿廡傾頽甚非所以馨祀事隆教

化也謀新之咸樂從因捐廉俸若干閱數月諸君子

之樂輸者又凡若干乃涓吉於今年三月乙丑興工

重修至八月丁卯事竣因爲文記其事以告後之人

按蠡邑學宮面城宮牆與城垣相間止數武牆以內

爲泮池池上有橋由橋而進爲櫺星門門內左右爲

名宦鄉賢二祠又進之戟門爲楹三門以內中唐凡

麗牲之石十有三唐之上爲階階之上爲大成殿殿

中南向一室安 至聖先師位東西二室安四配又
東西二室安十二哲唐之旁爲東西廡各五楹凡此
皆與舊制同大成殿後隔一牆有門北達崇聖祠祠
五楹祠之東爲明倫堂亦五楹前爲庠門繚以周垣
舊時崇聖祠在東明倫堂在殿後以不合法式遷建
之此與舊制異凡工材土木用金錢若干皆邑人士
司其出入教諭鞏君東垣訓導王君元瑞董其成例
得書名於石又忠義節孝祠舊制全無擬於庠門左
右建忠義孝弟二祠尊經閣東隙地幽靜節孝祠建
焉按古凡祠廟碑皆有銘謹爲銘曰

惟天生民惟皇降衷智愚雖判性善則同火然泉達
四德皆充化三千士爲萬世宗漢唐宋明 廟祀攸
隆爰暨我

朝典重

臨雍凡厥州邑咸有黌宮師徒濟濟於樂鼓

鐘惟蠶有學在邑治東始建自元嗣葺加崇歷年旣
久頽矣垣墉有棟其折有草其豐爰謀修治衆議允
從咸輸金幣鳩材庀工經營伊始庶民來攻自春徂
秋卒事髹彤唐陳修邃棟宇穹窿宮牆勿列類璧池
通中爲享殿惟簷則重俎豆筍處於穆肅雖惟茲在
事夙夜亟公工儉成速銘石旌庸仲丁釋菜祀事惟

恭諸生習禮肅乎有容緬彼作聖實基養蒙作事謀
始毋蹈虛空惟此六藝習焉有工凡百君子聽言則
聰勒辭敬告貞珉載礪繼續修之是爲後賢之持終

重修南北城樓奎樓記

知縣

郭奇中

攷蠡治在漢爲陸成縣後漢入蠡吾本初元年改博
陵縣晉泰始元年改博陸縣唐武德五年以縣置蠡
州後復廢州爲縣宋雍熙四年置甯邊軍景德元年
改永甯軍金天德三年改蠡州明洪武八年改州爲
縣崇正季年設兵備道所以控制軍務拱衛

京畿蓋重地也縣故有城傾圮已久乾隆年間前任梁

公徹地一新周圍八里南北二門南永安北長樂上
建譙樓以壯觀瞻以資守禦又於城東南隅建奎星
樓以煥文明迄今百餘年雉堞依然而南北二樓摧
殘剝落東南奎樓基址僅存而已壬申夏余攝篆茲
土周閱城垣惻然念之與諸寅好閤城紳士謀欲重
修因河水漲發民力未逮改歲爲癸酉春始行營建
予與諸寅好捐廉爲倡復勸紳商共勦盛舉諏吉立
柱礎架栒櫨會膏雨迭降麥秀油油趨事之人無不
踴躍是役也用不費而輦飛鳥革壯麗可觀成雖速
而料實工堅綢繆可久董事諸君子之盡心不可沒

也至後之人葺而修之俾勿壞則予與梁公俱有光也夫

新建忠義節孝兩祠記

知縣

彭美

癸酉秋予奉

命來守斯土視事之初謁廟閱城第見城垣雄壯廟貌巍

峩而忠義節孝祠獨闕心竊異之時方奉大府檄飭

修瀦龍河南北兩隄經營擘畫心力交瘁兩年幾無

暇日今年春大工告竣予方有志補祀典之闕適武

舉齊君畫一武庠郭君殿一以修補城根爲請卽令

傾者填之陷者補之工將成召二紳謂之曰蠡邑百

廢具修而祀典所關之忠義節孝祠蕩焉無存君等
其有意乎二紳曰有志焉某等知公之未暇弗敢請
也今隄事成矣請復勞心力爲之予曰唯唯夫忠義
節孝宇宙內之完人也發潛闡幽守土者之責任也
以宇宙之完人而闕其祀膺守土之責任而憚其勞
可乎願相與成之爰鳩貲購材相宜度勢擇基於明
倫堂之左分爲兩祠前忠義象軒昂也後節孝寓幽
靜也盟心於二年之前集事於隄成之後贊勦則把
戎尤君愷經理則齊郭二君督工則武庠魏君兆熊
齊君會一從九劉君殿魁邑之紳耆皆協力贊成之

兩閣月而祠宇煥然一新竊謂事無大小爲則成怠
則廢前日之廢修已無可考今幸告厥成功後之人
將因是祠以求忠義節孝之真因求真以維綱常名
教之大矯思立義屹然自樹無疚於心無忤於物則
風氣之蒸蒸日上豈徒科名仕宦之爲耀哉余旣樂
觀其成又將與諸君別爰紀其事以貞諸珉

彭山人傳

邑人

李璫

順治十五年蠡吾彭之燦南如蘇門坐餓嘯臺上孫
鍾元徵君挽之不可七日而死天下稱之曰彭餓夫
云於時其姪山人名通者亦與上谷張秉曜結北印

社秉曜云浩然歸去事如何山人云不向邯鄲惹睡
魔秉曜云生死總同秋色老山人云北邙山畔月明
多已而笑曰生與死亦何分哉乃放曠行歌而一混
於酒好學書及畫時絕炊妻子嗷嗷尙據案揮毫不
輟已而竟起出門去妻子亦不知何往也嘗遊京洛
貴顯家皆愛禮之醉輒作狂語曰許大長安何寂寂
也有衣以錦衣者晝衣夜被其妻曰盍珍之山人昂
首曰汝欲使此衣役我耶見人輒笑傲或與人語至
半輒一笑而止人延之必爲置酒半酣輒歌呼嗚嗚
不自休無酒則攢眉而去每高吟云終日萬吞吐不

道一俗字年八十餘飲酒浩歌如故而書畫益進

龐魏氏傳

李 塏

龐魏氏蠡之龐家莊人也夫龐國棟娶隣村魏家葛魏氏女邑令以賢詳聞上憲曰龐魏氏因以稱氏夫早卒守節不嫁而祖姑徐氏姑董氏皆先守節三氏一堂氏竭力養之不使姑與祖姑一匱勤也勤女工刻無甯者織棉布一日一端或給之錢爲織每端必長一二兩曰漿糲所滋也與以直多一錢必璧之農時躬耨而不與男子交語比隣不過往祖姑八十餘目昏躬負之如廁向曝返牀復負入姑亦耄壽負出

入如之終葬以禮族或周以喪具資氏曰吾貧誓貸
用必償如不使我償是視我非人也日夜織不期月
皆補完樞發披衰負引或請代氏曰吾二姑无子孫
吾在卽其子孫也可代乎姑之窆以夏六月雨水漏
塗氏躬衝水泥擗踊長號從觀者皆爲流涕雍正三
年邑大水饑

朝廷開倉令有司賑邑令喬公查饑民過其門見室戶零

落曰此貧家也盍告賑里役曰寡婦曰寡婦亦吾民
也若饑則與之里役戶外呼之告以故氏曰氏固乏
炊然問食 朝廷米償不役以白喬公曰賑也何

償役復之氏曰償則食不償吾孱婦耳何功以報
朝廷而徒食乎不可鍵其戶再呼之不應喬公歎息而去
後具刺歸之米一石令邑東鄙郵而致氏又辭不受
來役力請曰邑父母養汝節可拒乎氏不得已奉刺
及米置於案拜而受上憲聞皆賢之旌表其閭族黨
公選近族賢者爲嗣以世其家

藝文志 詩

七月初六日禱雨輒應 巳卯

錢天錫

焦土當長夏祈天正戴星民方歌太甚神已鑒維馨

初日沈遙海

時赤日東出
忽爲雲掩

微風繞曲櫺干郊雲出岫

一滴水分瓶肥蠶逃深穴翔鷗度曉汀倏覘溪色碧
纔覺柳煙青瀾漫將千里呼雲快萬靈從茲生意起
秀色徧林坳

歸途急雨如注憩于村寺

三首

驕陽散盡黑雲屯眯目風沙暗遠村細雨晨飄猶擊
鼓涼飈暮捲已翻盆

忽覩雲中懸瀑布乍驚樹杪噴流泉甲兵好借銀河
洗督亢陂開萬頃田

解鞍野寺慶甘霖萬樹蕭森宿暮禽暫憩繩牀龍出
鉢懸知布地有黃金

明月篇

有引

人無不愛月者而平章之權獨歸幽人騷客大
率以吟弄爲豪舉耳其實春蘿秋桂未駐望舒
之車白日紅塵且鑠織阿之彩卽一輪半窺穿
牕照席亦未必寤寐以之予以憲署新設費且
不貲遂卽蠶吾敝邸而託處焉入夏苦熱一室
湫隘甚兼以地方驚魂未定中且不寐因宿於
廳事中夜披衣起行自月之如鈎如弓如扇如
圭亦嘗悉其升沈之故窮其盈缺之因夏季秋
孟久旱呼天素食輒彌旬月額之雨旣增怵舞

有曙之星復切仰瞻奄忽中元迴環把翫望觀
舍於白雲嘆關山之伊阻聽邊秋之畫角剪萼
芒於中天蓋與素娥周旋者歷夏秋矣黃庭之
飲未盡青蓮之間可蠲因爲放歌以酬圓魄

欲盡看花興花閒坐未眠明月愜清賞追陪亦復然
自入長夏苦炎熱冰盤露瓊對嬋娟時分瑤鏡清樽
裏靜瀉銀河卧榻前吸盡霜雪不知暑杖屨嘗生碧
海煙直將蟾兔數秋毫梧桐疎影盪煙霄僊人種玉
出蓬島神女弄珠遊漢皋午夜瞻雲不停步稽首冰
輪且暫駐忽從雨後湧金波已覺雲中披玉樹有時

伫立竟清宵烏鵲驚飛破寂寥不知雲路天涯杳恍
見音書玉宇飄遙憶征人吹蘆管五更鼓角新蟾滿
一天寒色邊榆墮徧地霜橫塞草短何如瀟湘煙雨
秋去年此夕醉蘭舟乘興酣歌來北渚命禱嘯咏倚
南樓千里清光銷白羽好攜真人天際遊

憂旱

己卯中元後

滂沱未浹旬炎風長旱草枯盡玉山禾乾死紫芒稻
辟如尪羸人一餐苦不早饘粥未能繼微軀豈能保
老弱號路傍倉儲半如掃昨夜陰雲覆初日何杲杲
冀北多膏雨不待桑林禱太息圻以南生態日枯槁

疾威何時歇吞聲叩穹昊

旱災責躬示守宰

崎嶇兵荒間俛仰天人際予遺能幾何吞聲哭炎厲
感召固有因昊天豈不惠聖明罪已詔哀痛動四裔
甘霖望諸君庶可回災沴賈鄭不復作良牧久淪替
愍此亂離眈原無終日計蔓草縈白骨石人皆掩袂
千門聚哭聲積慘成氛翳獻滄未巡行誰與宣鬱滯
訟獄未衰止誰與出輕繫敲扑一任情顛隕如秋蒂
急遞馬啼穿九折車軸敝使者紛相望誅求苦無藝
里胥走村舍雞犬索常例築鑿雖捍民木石困精衛

開採從茲始膏液恐難繼饑軍忽倒戈殺氣結陰曠
探丸行白晝夜戶皆早閉猛虎不能獵或乃搏田豕
有心無其術徒手覓良劑來牟已不登饘粥豈能濟
羸老踣路傍得毋爲瘴癘蠲縉及惇獨長吏曾徧詣
胥吏一乾沒井里多僵斃以此逢憚怒敢望天威霽
天遠人道邇治亂時惟帝明燭照逃亡大綱去苛細
君子有徽猷皇穹執左契

八日安州微雪越數日還蠡道中積雪獨甚

庚辰

田家八日皆占晴槁壤春初獨望雪幸當殘臘猶堪

瑞

是年正月十日始立春

搖裔從風洗苑結我來行役向濡陽

九河支流已斷絕

安州厥流維九河徐曹苞平一畝泉唐滋沙方順

堂前瓊

樹栽未成城上壁臺凍欲裂安得盈尺表豐年蜚蠊

入山遺蝗滅竭來蠡吾三舍餘環顧郊林正飄瞥縱

橫萬樹散珠霏歷亂千村霏玉屑帝德已流萬井膏

主恩預調七政節

路槐行

昔在孝寬為刺史路側植槐蔭行旅枵腹久已斷晨

餐烈日猶能鎔漏釜攀枝執條實離離剗粒難救道

旁痠婆婆不愧榆為兄苜蓿闕賓同楚楚

西域傳闕賓地平陸

有苜蓿

三種已盡又何求桑下眼穿二胸脯未聞補

腦制頽齡可堪倚樹埋焦土何如背觴生葆穀虛星
掩泣問天庾

枯榆行

典妻鬻子連比屋泪盡孤雛與寡鵠柜柳

爾雅註柳當作桺柜

柳似桺皮可衰作飲

剝殘難作羹姑榆採罷不盈腹髓盡猶防

鼠雀欺皮存尙恐烏鳶逐我聞榆地不宜種五穀一

月收乾爲旨蓄青者釀酒白齧醢

崔實曰二月榆莢成及青收乾以爲

旨蓄色變白將落可作齧醢註榆莢至冬釀酒滑香宜養老齧醢卽榆醬

隨節早晏稱所

欲誓將移汝種天上歲歲榆莢潤乾谷更無人貸監

河粟

道間典鬻妻孥者既衆且賤出私錢贖之泫然
感豫州舊事有作

前年宛葉苦兵荒百里無煙屍枕谷壯男訣絕且偷
生弱息熒熒換斗粟羸瘵已成風土殊遊魂日夜望
鄉哭冀方兵後復苦旱伐木毀廬歌采蒿下山忍見
靡蕪盡去婦未必糟糠足幼女難作謝家婢嬰兒蚤
別輔氏族牽衣頓足衢路旁赤日黃埃迷遠目鮮民
有淚切聞猿鴛老無依傷舐犢緡錢易耗粟不生骨
肉難拋死亦速此日流離恨轉蓬百年生聚曾摩轂
文忠清獻彼何人聖王發政先惇獨

見羸老拾苜蓿恐其不及夕矣

堊葵齧盡蘗蕭空捧詔何人問老癯自比王蒸難計

日猶從宮樹覓懷風

樂遊苑玫瑰樹下有菝蓂名懷風或謂光風見西京雜記

三月二十日平明微雨步禱道中則泥湓不能

行矣予與諸博士孝秀輩俱切滂沱之想有頃

卽止

祈請走童叟已及麥秋候

是年三月十七日立夏

平明潔管薌

始見雲出岫習習扇微風涓涓瀉清溜均堂儵已盈

蹄涔尙恐漏庶幾濯石田亟欲決巖竇胡爲復屯膏

溝塍空刻鏤

登蠡城 有引

三月念一日偕姚令步至蠡城見其五仞壁立
百雉襟帶可以施展守具一望闐闐聯街聚陌
非復頽墉集雀荒堞啼鳥之景矣前連令因舊
任叢議甚惋惜之予亦以修城得謗復奉留旨
登高臨下爲之慨然

漢武全盛時上谷苦侵畧秦運去銷沈名王皆面縛
春秋先內治巖疆急鎖鑰城塹當要害千家巖虎落
啟塞宜從時重閉尙虞惡戎馬繕空城陂場亦偕作
建侯芳草昧綿力忝荒度毀家紓國難繇已恤民瘼

惜陰似陶侃寬民如尹鐸豈獨備甲兵聚廬欣有託
危樓肅臨淵修塗跨延閣列隧疏百廛始知井里樂
險中心力盡多口猶相索寇腹築受降休璟曾錯愕
六旬就三城斥地走戎幕乘間據涇原可使吐蕃卻
舉國從書生忠謀遂廢格慮始良獨難人言亦吾藥
自易至齋喜用一百韻

畿輔炕旱既久炎風四扇嵐山煨壑土脈盡枯
非翻盆倒井不能回炎燁而滿阡谷也今上敬
天勤民布袍露禱減大官之膳發責躬之詔壇
場圭璧既罄御府金錢畢出軍興之芻豆可獨

郡國之倉廩可虛方古之太僕省穀水衡省肉
猶爲細節至於錄寃獄澄吏治禁奸胥於荒政
十有二之中盡六計弊羣吏之法每覽唐宋史
如乾符中勅一切州縣停徵仍發義倉亟加賑
濟而有司不能奉行如熙甯截發累百鉅萬而
於百姓無絲毫益誰使主德之壅闕然後知聖
明之慮遠慢殘之律嚴也京師得雨獨蚤僅自
良涿而止天心之仁愛尤爲昭赫浸尋五月十
七日靈雨普零狂喜待旦嗣是霽霽未已每於
晴空朗月之下忽爾陰雲四集溟濛浹甸土脈

畢發經行阡陌之間感黍苗之芃芃怙君德於
無既因爲長律以紀之

屯蹇曷終極夷傷莽未瘳荒塗栖野葛久血染茅蒐
卒死供吹劍餘生寄浙矛處堂甯有燕問俗久無鳩
厥極其憂也雨餘苗槁不

詩闕

蠡四民向化作樂陶行以誌感 祖建明

樂陶行吾儲吾聰知以作睿慧而生明庠序惟謹孝
弟宜興靡有作者德造胡成而今而後吾知勉功學
而能愛仕則進忠樂陶行猗歟休哉咸愛我公

樂陶行吾深吾耕勤於東作望乎西成田疇既易厥

麥芄芄桑田靡稅思媚胡興而今而後吾力夫農百
室盈止婦子斯甯樂陶行猗歟休哉咸戴我公
樂陶行吾出吾程行旅載道譏而不征路無拾遺嘯
聚靡驚無有禁者行商斯窮而今而後戴月披星熙
熙厥路穰穰靡爭樂陶行猗歟休哉咸感我公
樂陶行吾安吾生市井不擾屨而不征鈞石旣和權
量無爭靡有勸者物價胡平而今而後坐衙於庭以
有易無龍斷弗登樂陶行猗歟休哉咸念我公

烈婦引

趙旭

徐烈婦者邑孝廉王侯妹也夫亡守貞事姑撫遺孝

慈備至人以是稱之尙未之奇也無何遺孤伯麟亡
氏曰曩所以不死者以徐氏一塊肉耳今天不祚徐
兒已殤可以見夫於地下矣家人悉力勸諭意不少
移及自經屍立不仆香滿堂室雖古義士何以加哉
士大夫嘉其節多挽詞邑賈生彙題成帙名曰烈香
集余以成仁取義在巾幗尤爲罕觀風化攸關未可
泯而弗彰因增二詩而併爲之序勒之蠡志以傳不
朽云

其一

義烈高千古綱常備一身江山如許地巾幗幾何人

月冷婺星黯花翻青塚春白楊聽杜宇歲歲泣芳辰

其二

正氣存天壤丹心照碧澌眼枯黃鵠操腸斷伯麟兒
慷慨悲歌地松筠冰蘖姿貞魂知不泯應傍雪棠枝